

Atleta Arubiano lo haci solo den landamento sincronisa na Merca

Kyra Hoevertsz ta logra clasifica pa e Junior National Championships



Kyra Hoevertsz cu ta haci landamento sincronisa na Merca.

ORANJESTAD - Desde December ultimo, e hoben atleta di e deporte di landamento sincronisa, Kyra Hoevertsz, a establece su mes na California, Merca, pa asina continua cu su estudio y tambe desaroya su mes den su deporte como miembro di e club Walnut Creek Aquanuts.

Siman pasa el a participa na e "West Zone Junior Championship" na Beaverton, Oregon, caminda cu e mester a logra supera e puntuacion di 73 punto pa e por a gana e derecho di participa na e campeonato nacional di Merca cu su solo den e categoria "junior", cu ta di 14 te cu 18 aña di edad. Pa Kyra e tarea aki no tabata uno facil, mirando cu e tin apenas 14 aña di edad y ta pues entre esunnan

di mas hoben di e participantenan. Pero el a traha duro pa por a logra clasifica, mirando cu esaki lo a nifica un logro extraordinario pe.

Durante e "West Zone Junior Championships" e prome mita di e competencia tabata e rutina di musica. E presentacion a mostra claramente cu e actuacion di Kyra a progresa, unda cu el a impresionar e huesnan tambe. Na final di e presentacion, su puntuacion a wordo presenta di ta 74 punto. Mas cu un punto mas di loke e mester a alcanza pa por a clasifica pa e campeonato nacional. Cu un cara di alegria, Kyra a mostra con contento e tabata ta. El a logra su meta.

Pero e mester a competi un biaha mas, esta den e figuranan tecnico. E compe-

tencia ey a tuma luga e dia siguiente y tabata tin no menos cu 95 participante. Figuranan tecnico ta un di e fortalezanan di Kyra y e tabata tin confianza cu esaki lo a bay bon. Como e unico landadora no procedente di Merca, Kyra a logra un puntuacion total cu a posicion'e na 11 luga entre e 95 landadornan, lagando pues un tremendo impresion atras.

Bista awor ta cambia pa e Campeonato Nacional Junior di Merca, cu ta tuma luga na Greensboro, North Carolina, na luna di April. Eynan Kyra Hoevertsz lo ta competiendo cu su club Walnut Creek Aquanuts den e evento di team y tambe den solo. Pabien Kyra Hoevertsz cu bo logro. □